

सताव मिं लै परमेश्वर कै मानणी दानियल

इसायली मैस बार-बार परमेश्वरक बातोंक पालन नि करछी। उं दुसरा दयाप्तोंक पुज करछी, और न्यायक खिलाफ काम करछी। उं गरीब और बे-सहार मैसोंक मदध नि करछी। यैक लिजी परमेश्वरल बेबिलोनियोंक रॉज कै अनुमिं हम्ल करण दे। और उ रॉज उनार भौत मैसों कै बन्दी बणैबेर आपण देश मिं लि गो। लेकिन थ्वाड़ इसायली मैस दुसरा दयाप्तोंक पुज नि करिबेर परमेश्वर मिं भरौस करनै रई। जबकि उं उ देश मिं पुर्जी, तब लै उं परमेश्वर कै माननै रई। और परमेश्वर उनर दगाड़ रई।

दानियल शिनार देश मिं

(दानिय्येल १)

जब यहोयाकीम यहूदाक रॉज छी, उ बखत बेबिलोनक रॉज नबूकदनेस्सरल यरुशलेम मिं हम्ल करिबेर उकै घेर ले। तब प्रभुल यहूदाक मैसों कै नबूकदनेस्सरक हात मिं सौंप दे। और नबूकदनेस्सरल यहूदाक रॉज, ठुल सैपों और दुसरा थ्वाड़ खाश मैसों कै आपण गुलाम बणैबेर शिनार देश मिं ल्या। और उनर अलावा वांबे परमेश्वरक भवनक सुन-चांदिक भॉन-कुणों, और भल समान कै लिबेर आपण द्यप्तक मंदिरक बनार मिं धरि दे। वीक बाद नबूकदनेस्सरल आपण महलक मुखिया कै यौ हुकुम दिबेर कौ, “तुम म्यर खाश-खाश काम करणक लिजी याँस यहूदी जवानों कै जो देखीण चाणाक और दिमागदार हो, लिबेर आओ। और तुम उनुकै तीन साल तलक यांकि बोलि-भाषा, रीती-रिवाज और ज्ञान-विज्ञान सब सिखाओ।”

तब मुखियाल जो जवानों कै रॉजक लिजी छांटौ, उनुमिं दानियल, हन्नयाह, मेशाइल और अजर्याह नामाँक लौंड लै छी। उनेरि हरेक चीजकि जिम्मेवारि रॉजल लि रॉखछी। लेकिन दानियल और वीक तीन दगडुवोंल यौ

सोचौ कि हमुकै विदेशी दरबारक खाँण खैबेर आपु कै अशुद्ध नि करण चैन। यैक लिजी उनुल मुखियाक पास जैबेर उधैं बिनती करी, “तुम हमुकै महलक खाँणक बदाव साद खाँण-पिण दिया।” लेकिन मुखियाल कौ, “अगर मी यस करनू, तब तुम दुसारे जवानों हबेर कमजोर है जौला, और तब म्यर के हवल!”

तब दानियलल आपण देखभाल करणी सैप धैं कौ, “किरपा करिबेर हमुकै दस दिन तलक साद खाँण-पिण दिबेर देखि लियो कि हमुमिं दुसारे जवानों हबेर के फरक उँछा।” तब उ सैपल उनेरि बात मानिबेर दस दिन तलक उनुकै साग-पात और पाणि दे। और दस दिनक बाद उ सैपल देखौ कि दानियल, हनन्याह, मेशाइल और अजर्याह दुसारे जवानों है भौल देखीणई। यैक लिजी उ आँब उनुकै रॉजक ठैराई खाँणक बदाव रोज यै खाँण दिण लागौ। और परमेश्वरल उं चारूं कै सब किसमक बुद्धि और समझ दे। यैक अलावा दानियल स्वीणोंक अर्थ कै लै बतै सकछी।

यैक तीन साल बाद मुखियाल यौ सबों कै रॉजक सामण ठाँड़ करौ। जब रॉज उं सबोंधैं बात करणौछी, तब उकै दानियल और वीक तीन दगडू जाँस समझदार और क्वे नि मिल। जो लै सवाल रॉजल उनुधैं पुछी, वीक जबाब उनुल दे। उं रॉजाक सब जादुगरोँ और तांत्रिकों हबेर दस गुण जादे बुद्धिमान छी। यैक लिजी रॉजल उनुकै आपण दरबार मिं काम करणक लिजी धरौ।

नबूकदनेस्सरक स्वीण

(दानियेल २:१-२३)

यैक बाद एक रात नबूकदनेस्सरल एक भयंकर स्वीण देखौ, जैक कारणल उ भौत जादे बेचैन है गोय। और वीक नीन लै भंग है गेई। तब वील यौ हुकुम दे, “हमार देशोंक जदु लै पुछ्यार, जादूगर, तांत्रिक और ज्योतिषी छन, उं सबों कै यां बुलाओ, जैल हमुकै हमार स्वीणक मतलबक पत्त लागो।” तब उं सबै मैस रॉजक महल मिं वीक सामण पुज ग्याय। तब रॉजल उनुधैं कौ, “मील एक भयंकर स्वीण देखौ, जैक कारणल मी भौतै बेचैन छूं, और मेरि नीन लै उड़ गे। तुम मिंके वीक अर्थ बताओ।”

यौ सुणिबेर पुछ्यारोंल कौ, “हमार महारॉज लाखूं बरस तलक ज्यून रओ! महारॉज, तुम आपण स्वीण हमुकै बताओ, जैल हम वीक अर्थ तुमुकै बतै सकु।” लेकिन रॉजल उनुधैं कौ, “मी आपण स्वीण तुमुकै नि बतून। जब तुम मिंके म्यर स्वीण और वीक मतलब भली कै समझाला, तब मी

तुमुकै वीक बदाव इनाम द्यूल, और म्यर राज मिं तुमुकै ठुलि-ठुलि जांग लै मिलेलि। पर अगर तुम म्यर स्वीण और वीक मतलब मिक्कै नि बतै सकला, तब तुम मेरि यौ बातों कैं याद धरिया कि मी तुम सबों कैं भली कैं थेच-थाचिबेर तुमार घर लै टोड़ि-टाड़ी करि द्यूल।”

यौ सुणिबेर पुछ्यारोंल रॉज धैं दुबार कौ, “रॉजजू, तुम हमुकै आपण स्वीण बताओ, तब हम तुमार सेवक तुमुकै वीक मतलब बतै द्यूल।” रॉजल उनर जबाब सुणिबेर कौ, “पक्क यौ बात तुम म्यर सामण टॉल-मटोल करणक लिजी कूणाछा। लेकिन मील जो कै है, सो कै है। तुमुल आपस मिं सांठ-गांठ करि है कि जब तलक मी तुमर झुट जबाबों मिं नि फस जाँन, तब तलक तुम मिक्कै ठगणक कोशिश करनै रौला! लेकिन जब तलक तुम मिक्कै म्यर स्वीण नी बताला, तब तलक मिक्कै पत्त नी ह्वल कि तुम स्वीण अर्थ सच्चि या झुटि के बतूणाछा।”

फिर उनुल कौ, “महारॉज, यौ दुनी मिं यस क्वे लै मैस न्हैं, जो तुमर यौ काम करि सको! और आज तलक क्वे लै रॉजल आपण पुछ्यारों धैं येसि टेड़ि बात नि पुछि। महारॉज, जो बात तुम हमुधैं पुछणाछा, उकै द्याप्तोंक अलावा क्वे नि बतै सकन, और उं यां नि रुन।”

यौ सुणिबेर रॉज कैं भौत जादे रीश ऐ। और वील यौ हुकुम दे, “हमार देशोंक सब पुछ्यारों कैं मारि दी जाओ!”

यौ हुकुम पुर देश मिं सुणाई गो कि सब पुछ्यारों और दुसार ज्ञानियों कैं मारि दियो। इनुमिं दानियल और वीक दगडु लै शामिल छी। तब दानियलल रॉजक पौरदारोंक मुखियाक पास जैबेर उधैं पुछौ, “रॉजल इदुक भयंकर हुकुम किलै निकालौ?” और तब वील उकै पुर बात बतै। यैक बाद दानियलल रॉज धैं पुछवा, “महारॉज, तुम हमुकै थ्वाड़ और बखत दियो, तब मी तुमुकै तुमर स्वीण और वीक मतलब द्विवै बतै द्यूल।” यौ सुणिबेर रॉजल कौ, «ठिक छु।”

यैक बाद दानियलल आपण तीन दगडुओं कैं यौ खाश बात बतैबेर उनुधैं कौ, “हम सब झणी परमेश्वर धैं यैक बारि मिं बिनती करनू कि उं हमुकै यौ अनजान स्वीण और वीक मतलब लै बतै दियो।” तब उनुल यस्सै करौ। और उ रात मिं परमेश्वरल दानियल कैं रॉजक स्वीण और वीक मतलब समझै दे। तब दानियलल परमेश्वरक लिजी यौ सब कैबेर धन्यवाद दे,

“परमेश्वरक नाम हमेशा-हमेशाक लिजी धन्य छु! मैस कैं बुद्धि और सामर्थ वी दिनी।

वी रितु-माश बदउणी और हरेक चीजक बखत ठैरूणी छन। रॉजों कें बढूण-मितूण उनरै हात मिं छु।

परमेश्वर भेदोंक खुलाश करनी, किलैकि उनुबे के लै छिपी न्है।

हे म्यर और हमर पुरखोंक परमेश्वर, मी तुमुकें धन्यबाद दिबेर तुमेरि अराधना करनू! किलैकि तुमुलै मिकें बुद्धि और सामर्थ दी रॉखी। और आँब तुमुल हमुकें रॉजक स्वीणक भेद लै बतै है, जो हमुल तुमुधैं मांगछी।”

दानियल रॉजक स्वीण बतू

(दानियेल २:२४-४८)

यैक बाद दानियलल पौरदारोंक मुखियाक पास जैबेर कौ, “तुम कैकणी नि मारो, किलैकि मी स्वीण और वीक अर्थ द्विवै रॉज कें बतै सकनू!” यौ सुणिबेर मुखिया दानियल कें सिद्द रॉजक पास लिबेर गो। तब रॉजल दानियल धैं पुछौ, “के तु सांचि मिं म्यर स्वीण और वीक अर्थ बतै सकछै?” दानियलल कौ, “महारॉज, जो गुप्त बात तुमुल पुछि रै, उकें क्वे लै मैस नि बतै सकन। लेकिन स्वर्गक परमेश्वर सब गुप्त बातों कें जाणनी उनुलै अधिल कै हुणिवालि बातों कें तुमुकें स्वीण मिं दिखा।

स्वीण मिं आपण सामण तुमुल एक ठुलि मूरती देखी, जो भौत उच्चि और चमकदार छी लेकिन वीकि शकल भयंकर छी। वीक ख्वर चवख सुनक, कानि और छाति चांदिक, कमर पितवकि, खुट लुवाक और पैतोइ लु और मॉटल बणी छी। जब तुम उकें देखणाछिया, तब अचानक मेलि पखाण बे तेलिकै एक ठुल ढुडल बरकिबेर मूरतिक खुटों मिं टक्कर मारी जैल उ मूरतिक टुटिबेर टुकुड़-टुकुड़ है ग्याय। पितव, चांदि और सुनक बणि हिस्सक पाणि-पाणि है गोय। उ खॉवक चिलक चारि है ग्याय, और हावल उनुकें वांबे अलोप करि दे। वां उनर नाम-निशाण नि रय। लेकिन जो ढुडल मूरती कें लागछी, वीक एक ठुलौ पहाड़ बणिबेर पुर धरति मिं फैलि गोय। यौ तुमर स्वीण छु, आँब मिं तुमुकें यैक अर्थ बतनू।

महारॉज, स्वर्गक परमेश्वरल तुमुकें यौ दुनी मिं भौत ठुल राज-पाठ, सामर्थ और महिमा दी रॉखी। परमेश्वरलै धरतिक मैस और सब जीव-जन्तओं मिं राज करणक लिजी तुमुकें ठैरा। तुम उ मूरतिक सुनक ख्वरकि चारि छा। लेकिन तुमर राज एक दिन खत्म हवल, और फिर एक नई राज

हवल। यौ तुमर राज हबेर कम हवल, जस चांदि, सुन हबेर कम छु। उसिकै वीक बाद फिर एक तिसर राज हवल, जो और लै कम हवल, लेकिन उ पुर दुनी मिं राज करल। और जो राज वीक बाद हवल, उ लुवक जस मजबत हवल और उ आपण पैलिवाँल राज कै नाश करल। लेकिन पैतोइ लु और मॉटल बणी छी, यैक मतलब छु कि उ राज अलग-अलग हवल, थ्वाड़ ताकतबर और थ्वाड़ कमजोर। लेकिन जस तुम देखणाछिया कि मेलि पखाण बे तेलिकै एक ठुल ढुङल बरकिबेर मूरतिक खुटों मिं टक्कर मारी जैल उ मूरतिक टुटिबेर टुकुड़-टुकुड़ है ग्याय, उस्सै परमेश्वर एक यस राज बणाल जैक अंत कभै नी हवल, और यौ दूसार सब राज्योंक बिल्कुल नाश करि द्यल। उनुलै यौ स्वीणक जरियल तुमुकै दिखा कि अधिल कै उणिवाँल बखत मिं के-के हवल। यौ सब जरूड़ हवल।”

यौ सब सुणिबेर रॉजल दानियलक खुटों मिं आपण ख्वर धरिबेर पैलाग करौ। और उकै धूप और भेट दिबेर वीकि इज्जत-खातिर करणक बाद रॉजल उधैं कौ, “सांचि मिं तुमरे परमेश्वर सब द्याप्तों है ठुल और सब भेदों कै जाणणी छु! यैक लिजी तुमुल म्यर स्वीण और वीक मतलब द्विवै मिंकै बतै सकौ।” वीक बाद रॉजल उकै भौत जादे भेट दिबेर आपण दरबार मिं ठुल सैप बणै दे।

आंगकि भट्टी बे बचूण

(दानिय्येल ३)

यैक थ्वाड़ बखत बाद रॉजल सुनकि एक ठुली मूरती बड़वै, जैक उचाई साठ हात और चौड़ाई छै हात छी। और यैक बाद वील आपण अधिकारियों कै यौ हुकुम भिजवा कि तुम सब यां जॉम हबेर यकै देखो। जब उं सब जॉम हबेर वां मूरतिक सामण पुजीं, तब रॉजक दूतल उनुकै जोरल कैबेर बता, “जब तुम भुकौर, बंसी, सारंगी और सितारक अवाज कै सुणला, तब चौड़ हबेर यौ मूरती कै पैलाग करिया! अगर जो यस नि करल, उकै आंगक भट्टी मिं खिती जॉल।” और तब उं सबोंल यौ अवाज सुणिबेर मूरती कै पैलाग करौ।

लेकिन हनन्याह, मेशाइल और अजर्याहल यस नि कर। तब थ्वाड़ मैसोंल रॉजक पास जैबेर उकै बता, “वां तीन यहूदी मैस छन, हनन्याह, मेशाइल और अजर्याह, जनुल तुमर मूरती कै पैलाग नि कर!”¹

¹ दानियल यौ घटना मिं शामिल नि छी। है सकुं कि उ यौ बखत रॉजक के कामक लिजी कै दूर देश मिं जै रोछी।

यौ सुणिबेर रॉज रीशल लाल-पिडव है गोय। और वील उ तीनों कै आपण सामण बुलवैबेर उनुधै पुछौ, «तुमुल मेरि मूरती कै पैलाग किलै नि कर? ठिक छु, मी तुमुकै एक मौक आइ दिनु, अगर यौ बार उकै पैलाग नि करला तब मी तुमुकै आंगक भट्टी मिं खितवै द्यूल। और तब देखनु कि तुमुकै को ईश्वर बचू!» लेकिन यौ सुणिबेर उनुल रॉज धै कौ, “महाराज, हमुकै आँब और के लै सोचण न्है। हम तुमेरि यौ मूरती कै कभै लै पैलाग नि करूं, चाहे जे लै हो। किलैकि हम परमेश्वरक अलावा और कैकी पुज नि करन। अगर हमर परमेश्वर हमुकै बचण चाल, तब उं हमुकै जरूड़ बचाल। लेकिन अगर उं नि बचाओ, तो फिर लै हम तुमेरि यौ मूरती कै पैलाग नि करूं।”

यौ सुणिबेर रॉज कै हनन्याह, मेशाइल और अजर्याह कै देखिबेर इदुक जादे रीश ऐ कि उ बौई गोय। और वील आंगक भट्टी कै सात गुण और जादे तेज करणक हुकुम दे। फिर वील आपण सिपैनों कै हुकुम दे कि उनुकै बादिबेर आंगक भट्टी मिं खित दियो। वां आंग इतुक तेज छी कि जो मैस उनुकै आंगक भट्टी मिं खितणक लिजी लिजाँणाछी, उं वीक राफलै मरि ग्याय। और हनन्याह, मेशाइल और अजर्याह भूभान भट्टी मिं पड़ि ग्याय।

लेकिन यैक झिटघड़ि बाद रॉजल उछेइबेर कौ, “अरे, यौ के हौ, हमुल आंग मिं तीन मैस खितछी, लेकिन वां चार कसिक हई? और वां उ चौथुं को छु? अरे, उ तो ईश्वरक चारि देखीणौ! और उं सब अरामल वां घुमणई और उनुकै आंगल के फरक नि पड़णय!” तब रॉजल उ भट्टीक द्वारक नजीक लै जैबेर कौ, “ओ, हनन्याह, मेशाइल और अजर्याह, सबों है ठुल परमेश्वरक सेवकों, भ्यार आओ!” और उं भ्यार आई। जब सब मैसोंल उनर नजीक जैबेर उनुकै देखौ, तब उनुकै उनर आड मिं कै लै आंगक निशाण नि मिल और यां तलक उनार लुकुड़ों बे हन्तरैन लै नि उणैछी।



आंगक भट्टी मि दानियलॉक दगडू

यैक लिजी रॉजल कौ, “इनर परमेश्वर धन्य छन, जनुल आपण सेवकों कै बचा, जो उनुमिं भरौस करनी! इनल म्यर हुकुम कै नि मान और न दुसार द्याप्तोंक पुज करी पर यौ आपण

परमेश्वरक लिजी मरणक लिजी लै गई। यैक लिजी आँब म्यर यौ हुकुम छु, कि आज बे हमार देशोक सब मैस इनर परमेश्वरक खिलाफ क्वे के नि कओ। और जो लै यस करल, उकै मी मौतकि सजा द्यूल।”

यैक बाद रॉजल हनन्याह, मेशाइल और अजर्याह कै ठुल-ठुल पद देई।

दानियलक शेरों बे बचण

(दानियेल ६)

यैक बाद जब वांक रॉज दारा नामक मैस बणौ, तब वील दानियल कै आपण देशक सबुहै ठुल सैप बणूणक लिजी सोचौ, किलैकि उ सब दुसार सैपों हबेर जादे ईमानदार और भरोसक छी। तब दुसार सैप लोग दानियल कै देखिबेर भौतै जलण लागीं। यैक लिजी उ दानियल मिं दोष हुनण लागीं, पर उनुकै वीक क्वे गलित नि मिल। तब उनुल आपस मिं कौ, कि हम एक तरिकल दानियल मिं दोष लगवै सकनू। यैक लिजी उनुल रॉजक सामण जैबेर कौ, “हमार महारॉज खूब बढनै-फलनै रवो! तुम यौ हुकुम निकालो कि जो मैस तीस दिन तलक क्वे दुसर मैस या द्याप्तों धै तुमर बदाव बिनती करॉल, उनुकै शेरक सामण खित दी जॉल!” तब रॉजल कौ, «ठिक छु,” और यौ हुकुम निकालि दे।

दानियल रोज तीन बार परमेश्वर धै प्रार्थना करछी। रॉजक हुकुम सुणिबेर लै वील यौ करण नि छोड़ और उ आपण घरकि यरुशलेमक तरफकि खिड़कि लै घुन टेकिबेर प्रार्थना करनै रौ। जब उ मैसोल दानियल कै परमेश्वर धै प्रार्थना करण देखौ, तब उनुल रॉजक सामण जैबेर कौ, “महारॉज, दानियल तुमर हुकुम कै नि मानिबेर तुमर अनादर करणौ, और आपण परमेश्वर धै बिनती करणौ!”

यौ सुणिबेर रॉज भौत परेशान हौ, और ब्याव तलक दानियल कै बचूणक लिजी सोच-विचार मिं लागिं रौ। लेकिन ब्याव बखत उ सब मैस दुबार जॉम हबेर रॉजक सामण ऐबेर कूण लागीं, “आँब तुम आपण यौ हुकुम कै पुर करो, किलैकि यौ ऐक पक्क नीम छु और कै कै लिजी लै, क्वे हालत मिं यौ नि टई सकन।”

यैक लिजी रॉजल दानियल कै बुलैबेर कौ, “ऐ दानियल, जो परमेश्वरक सेवा तु इतुक भलिक करछै, आँब वी तुकै बचाओ!” यौ कैबेर रॉजल उकै शेरक सामण खितवै दे।

यैक बाद रॉज इदुक दुःखी हौ, कि न वील के खाय, और न उकै नीन ऐ। तब उ रात्ति पर उठिबेर शेरक भितेरक सामण जैबेर मरी मनल दानियल कें धात लगूण लागौ, “दानियल, ओ दानियल, के तु ठिक छै? जो परमेश्वरकि सेवा तु करछियै, के वील तुकै शेरों बे बचाछा?” तब भितेर बे दानियलल रॉज धै कौ, “महारॉज, तुम के फिकर नि करो, मी परमेश्वरकि किरपाल बचि गोयूं! किलैकि म्यर परमेश्वरल मि मिं क्वे दोष नि पाय, यैक लिजी उनुल आपण दूत कैं भेजिबेर शेरक खाप कैं बन्द करि दे। और मी ज्यून छूं।”

यौ सुणिबेर रॉज भौतै खुशि हौ, और वील आपण सिपैनू कैं भेजिबेर दानियल कैं वांबे भ्यार निकलवा। और उं मैसों कैं जो दानियल कैं शेरोंक सामण खितवूणक लिजी जिम्मेदार छी, उनुकै पुर परवारक दगाड़ रॉजल उं शेरोंक सामण खितवै दे, और उनुकै शेरोंल झपटबेर खै ले।

यैक बाद रॉजल यौ हुकुम निकालौ कि हरेक मैसों कैं दानियलक ज्यून परमेश्वर कैं मानण चैं, किलैकि उं चमतकार करुं और उनुलै दानियल कैं शेरों बे लै बचा।

इसिक उ बखतक रॉजोंक बीच मिं दानियल भौत ठुल पदों मिं रौ।